

Muhyiddin harap Tun M beri sokongan kepada kerajaan baharu
AstroAwani
11 Mac 2020
Firdaus Azil,

PUTRAJAYA: Pembentukan kerajaan baharu diharap mendapat sokongan bekas perdana menteri Tun Dr Mahathir Mohamad.

Perdana Menteri Tan Sri Muhyiddin Yassin berkata kerajaan ini sah di sisi undang-undang dan mengikut Perlembagaan Persekutuan.

Atas sebab itu, Ahli Parlimen Pagoh itu berkata beliau telah menulis surat kepada Dr Mahathir untuk berjumpa bila-bila masa dan berbincang bagi kepentingan negara.

Tambahnya, Dr Mahathir ada membalas surat itu dan berkata belum tiba masa untuk berjumpa.

“Saya dah beritahu, tulis surat dah, seminggu dah. Perenggan pertama saya mendoakan agar Tun M dan keluarga sihat, saya sebutkan, dan perenggan kedua saya kata, sekiranya dalam tempoh seberapa hari lalu perkara yang telah dilakukan menyinggung, saya memohon maaf.

“Para ketiga, saya tulis, kalau ada masa untuk saya bertemu dengan Yang Berbahagia Tun, tapi saya telah terima jawapan dari beliau yang mengatakan belum sampai masa untuk berjumpa.”

Beliau berkata demikian pada sidang media selepas mempengerusikan Majlis Mesyuarat Kabinet pertama sejak tertubuhnya kerajaan Perikatan Nasional, di Bangunan Perdana Putra, di sini, hari ini.

Muhyiddin berkata, kerajaan yang beliau bentuk dan pimpin pada masa kini, merupakan kerajaan untuk semua, dan rakyat mengharapkan agar kerajaan dapat memberikan perkhidmatan terbaik untuk mereka selepas bangkit dari kemelut politik itu.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/muhyiddin-harap-tun-m-berisokongan-kepada-kerajaan-baharu-233281>